

SATIRES  
PICARDES

---

I

LES PARTAGEUX.

I

In n'éra pus b'zoin d'servir pour maingi ;  
Tout ch'bien, qu'in dit, va éte partagei.  
Cha voura coire émieux q'chés républiques ;  
In n'éra pus d'moite' et ni d'doumestiques ;  
Outant l'ein q'l'eute in s'ra cht'heure tertous ;  
Chés grous ceinsiers i n's'ront pau puss eq nous ;  
Tout i pioch'ra, dit-on. — Pour eq j'el croiche,  
J'vous avoùrai, m'z'amis, qu'i feut q'j'el voiche.  
Q'meint partagei tous chés quiamps, chés catcheux,

Chés bieux bounets, chés coutrons, chés mantcheux?  
 In s'intendrot pour partagei tout l'terre,  
 Quant in n's'intend pou' l'succession d'sin père!  
 Chaquein vourot toujours avoir raison,  
 Quaisir pour li el pus belle mason.  
 Q'meint conteinter tant d'geins et pis d'tant d'sorte',  
 Qui vont truver leu part toujours troupe tchote,  
 Qui vouront d'z'ieux quand il éront des bous,  
 Pis des soulés, si l'lieux vient des chabouts?  
 J'gaj'ros, m'z'amis, min cu conte ein visage,  
 Q'huit jours après fouro r'q'meinchi ch'partage;  
 L'cin dounn'ro s'part pour ein verre ed brain d'vin,  
 Ein eute à carte' i perdro sin frusquin,  
 Taindis qu'ed z'eute' i dounn'reint à chés fêmes  
 Les fous qu'i sont, jusqu'à leux dernierr' plêmes.  
 Pis chés truands, qui manq'ront souveint d'pain,  
 Les laiss'ra-t-on, cheux-là, moirir ed faim?  
 Pusse eq nous s'rions oussi riches l'cin q'l'eute,  
 In n'voura pus fouaire errien pour l'einn' l'eute,  
 Foura q'chaquein i cultive sin cuin,  
 Meuche sin blé, s'in li prête ein moulin.  
 Chés coutriers n'f'ront q'pour eux des casaques,  
 N'boiront du lait q'cheux qu'il éront des vaques,  
 Et si gn'in manque ed vaque', ess z'amateur  
 S'arrainj'reint-i s'i n'n'aveint qu'eine à deux?  
 Ech pus malin i boiro tout l'traiture  
 Pour éviter à l'eute ed maingi ch'burre.

Vous convarez q'cha fra ein bieu gabgi,  
Si, coume in dit, in va tout partagei.

Vraignes, 1<sup>er</sup> Juin 1851.

## II

J'vous ai fouat vir l'eutt' jour qu'el socialisme  
I consistot, quand in n'avot pus rien,  
A r'preine à cheux qui conserveint leu bien :  
J'vas vous montrer jourd'hu q'sous l'communisme  
Gn'éra q'chés forts, chés gueulus qui maq'ront ;  
Ech peuve honteux pass'ra souveint d'sous l'tave ;  
Pour deux couchons nous n'avons qu'eine étave ;  
Ech tchoutin n'mainge eq quand q'l'eute il est rond.  
Put-t-on jamoua croire chés balivernes,  
Croire qu'in put, tout coume ein tas d'pourcheux,  
Sans s'étraner, jouqui dins des casernes,  
Boire à l'mèm' baque et vive in émoncheux ?  
Gn'a tout partout ein tas d'vilains goulafes  
Qui boit't et mainj't in bavant coumm' des gnafes ;  
Chés goulus-là, quand i n'feut pau payi  
Il' aval'reint l'erv'nu d'eine abayi ;  
Il' aim'reint mieux crever qu'ed quitchi l'tave,  
S'i gn'in restot l'motchi d'einn' botte ed rave.  
Cheux qu'il' ont peur ed preinn' pusse eq leux parts,  
N's'reint pau seuvé avu d'pareils maquarts,

I'n'crév'reint pouant l'cheinture ed leux culottes,  
 El pus souveint i n'récoureint q'chés miottes,  
 Et, seuf respect, i n'quireint pau d'gross' crottes.  
 Gn'éra ein moîte, ein maricha' d'lougi'  
 Pour tayi l'soupe épi el' partagi.  
 Malgré qu'i f'ra, c'hti-là, s'part toujours bonne,  
 Je'l'ploins s'i feut qu'i conteinte sin monne :  
 L'ein voura gras, l'eute i d'maindra du maigue,  
 Chti-chi du doux, chti-là n'voura q'du aigue ;  
 Mais si la gueule all' li veut du tourmeint,  
 I conteint'ro bien pus difficill'meint  
 Chés bounets blancs qui n'séreint r't'nir leux langues  
 Et ni finir el' premierr' leux harangues.  
 D'puis qu'Eve a 'té teintée edsous l'pommier,  
 Femmes qui piss't edsus l'même fémier  
 N'ont jamoua seu ess pardouner einn' feute,  
 Rester in paix deux minutes, dit-on.  
 F'ront elle' ilo meintir ech viux dicton ?  
 S'arrainj'ront-elle' ein s'moine avec l'einn' l'eute ?

Vraignes, 15 Juillet 1851.

---

## II

### SUR LE BON DIEU.

Q't'es malhéreux, Grous Jean, d'enn croire à rien !  
Ch'est t'ravaler ou niveu ed tin quien  
Eq d'enn pau vir qu'el bon Dghu moine el monne  
Et qu'ech n'est pouant l'hazard qui nous tourtonne.  
Tu n'as donc pau, dis, jamoua réfléchi  
Q'meint qu'in arrive et quitte ech monne chi,  
Ioù qu'in s'in va pourrir dins l'chimintchère,  
Couchi sus l'dous, ess bouque ploine ed terre ?  
V'là quand nou âme alle a quitchi nou corps,  
V'là coume ous s'rons tertous quand nous s'rons morts.  
Tu n'compreinds pouant, dis-tu, et n'pux pas croire  
Qu'einn' fos hors d'nous nou âme all' viche oucoire :  
Sans Dghu, pourquoi avoir peur ed la mort ?  
Quand in fouat mal pourquoi avoir du r'mord ?  
Ed viv' sins corps cha t'parot tout risibe :  
Ch' n'est pau s'peindant, s'lon mi, pus z'impossible,  
Ch'miraque i n'est pau pus grand sins qu'avu.

D'l'ombe ed bon seins feut ète dépourvu  
 Pou' n'pau vir cha et pour enn pau l'compreine.  
 Gn'a pau pus sourd qu'echtîd qui n'vut inteine.  
 T'es-tu d'maindé ioû qu'el monne i fini,  
 As-tu peinsé quidfos à l'infini,  
 A chés laimpions accrouchis à ch'grand dôme,  
 Qu'ech pus z'ignare est fourchi d'admirer,  
 Qui font si bien vir el néant ed l'homme ?  
 A telle hauteur ous'ros-tu t'mesurer,  
 Géant d'cinq pieds, chétive créature,  
 Qu'atteind la mort, chés vers et l'pourriture ?  
 Et si d'tout cha t'as ouccupé t'n'esprit,  
 M'diros-tu bien si tu yas rien compris ?  
 Tout cha existe et suit tranquill'meint s'route ;  
 Qui-est-ch' qui l'l'o fouat ? Ech n'est pau ti sins doute.  
 Ch' n'est pau aisé d'inveinter ess souleil.  
 Ch' mouldèle i luit : fas z'cin peu ein pareil !  
 Ou bien oucoire épréve à faire einn' leine,  
 Einn' tchote étoile, ou seul'meint einn' calcine,  
 Et j'm'expliq'rai, ech comprendrai l'raison  
 Q'tas d'enn pau dire à Dghu l'moinde ouraison.  
 Tu n'eros à rien, ourgueilleux philousophe,  
 Et t'in r'habile' in méprisiant ch'l'étoffe.  
 S'il est permis d'fouaire el comparaison,  
 Tu n'tranes pouant peindant deux jours el fiève,  
 Q'lache et couyon, et si péreux qu'cin iève,  
 Tu d'mane' à Dghu, à deux g'noux, t'guérison !